

# Grischun duai daventar «Il Tenero per sport d'enviern»

■ **(anr/fa) A Tenero sa chatta il center naziunal per ils sports da stad. Cun 83:0 vuschs ha acceptà il cussegl grond l'incumbensa Kunz: La regenza duai examinar lieus per fundar in center da sport d'enviern en Grischun.** Sco ch'el haja legì la fin da favrer en la gasetta «NZZ am Sonntag» tschertgia l'Uffizi federal da sport in lieu per in center da sport d'enviern, scriva *Rudolf Kunz* (pld, Cuir) en sia incumbenza. Tenor el e 94 sutsegnaders da sia intervenziun è il Grischun «directamain predestinà per in center naziunal per il sport d'enviern».

Els han menziunà l'exempel da Tavau, nua che la Federaziun svizra da skis ha gia ussa ses center naziunal da trenament. A Tavau pudessan ins era realisar trenaments da hockey sin glatsch, da patinadi da sveltezza, passlung ed auter pli. Kunz ha proponì d'incumbensar la regenza d'examinar pussaivladads per ch'il Grischun daventia il «Tenero per il sport d'enviern». La regenza s'ha declerada pronta da far quai, en collavuraziun era cun l'unìun «XXIV. Gieus olimpics d'enviern Grischun 2022». «Cuntrari a la confederaziun, la quala s'ha concen-

trada fin uss sin mo in lieu, sin Andermatt, propona la regenza d'integrar en l'evaluaziun era ulteriurs lieus pussaivels», ha infurmà cusseglier guvernativ *Martin Jäger*. El ha avertì ch'i vegnia a daventar difficil, «fin uss priorisescha la confederaziun il lieu Andermatt». Jäger ha ditg ch'il chantun vegnia a scriver anc durant il mais december ina charta a la confederaziun cun il giavisch d'examinar tut las variantas er en auters chantuns. Cun 83:0 vuschs e senza abstenziuns da la vusch ha dà il cussegl grond a la regenza l'incumbensa Kunz.